

PEMBERITAHUAN PERTANYAAN DEWAN RAKYAT

PERTANYAAN : LISAN

DARIPADA : DATO' HAJI MOHD FASIAH BIN HAJI MOHD FAKEH

TARIKH : 8.8.2017

SOALAN : NO. 33

Dato' Haji Mohd Fasiah Bin Haji Mohd Fakeh [Sabak Bernam] minta MENTERI PENDIDIKAN TINGGI menyatakan adakah Kerajaan bercadang memperkenalkan pengajian asasi 'double major' di Universiti Awam (UA) yang merangkumkan pengajian agama Islam seperti Syariah, Usuluddin dan lainnya dengan pengajian sains dan teknologi seperti perubatan, farmasi dan kejuruteraan bagi melahirkan generasi ulul albab yang berkebolehan dan berkepakaran dalam kedua-dua bidang.

JAWAPAN

Tuan Yang di-Pertua,

Untuk makluman Ahli Yang Berhormat, universiti awam (UA) telah melaksanakan beberapa program dwijazah bagi tujuan melahirkan generasi ulul albab. Tiga nilai yang diterapkan dalam Ulul Albab iaitu Qur'anik, Ensiklopedik dan Ijtihadik sememangnya telah diamalkan di universiti awam. Nilai Qur'anik iaitu teras dan prinsip agama Islam telah diterapkan kepada pelajar-pelajar terutama di Universiti Islam Antarabangsa Malaysia (UIAM), Universiti Sultan Zainal Abidin dan Universiti Sains Islam Malaysia (USIM).

Dalam konteks Ensiklopedik yang merupakan *multidisciplinary* pula telah diwujudkan sejak dulu lagi di UIAM dalam bidang undang-undang iaitu

undang-undang sivil dan juga undang-undang agama. Di USIM pula menawarkan program dwi ijazah iaitu:

- (a) Sarjana Muda Kaunseling dengan Kepujian + Sarjana Muda Pengajian Quran dan Sunnah dengan Kepujian;
- (b) Sarjana Muda Sains Komputer dengan Kepujian (Keselamatan dan Jaminan Maklumat) + Sarjana Muda Pengajian Quran dan Sunnah dengan Kepujian; dan
- (c) Sarjana Muda Sains dengan Kepujian (Bioteknologi Makanan) + Sarjana Muda Fiqh dan Fatwa dengan Kepujian.

Pihak UA adalah digalakkan untuk terus melaksanakan program-program berbentuk *multidisciplinary* dan *multilingual*. Dalam konteks ijtihadik pula, semua universiti sedang dan sentiasa mengamalkan budaya inovasi dan kreativiti melalui aktiviti penyelidikan & pembangunan (R&D).

Dengan pendekatan program akademik berbentuk hibrid (kombinasi bidang sains komputer, teknologi digital, sains tulen dan sastera) hasrat untuk melahirkan generasi ulul albab akan dapat dicapai selaras dengan aspirasi Pelan Pembangunan Pendidikan Malaysia 2015-2025 (Pendidikan Tinggi), Lonjakan 1 iaitu membangun dan menghasilkan graduan holistik, berciri keusahawanan dan seimbang.